



金剛般若波羅蜜經

姚秦三藏鳩摩羅什
元魏三藏留支
陳天竺三藏真諦
譯

金剛般若波羅蜜經



清刻龍藏佛說法變相圖

御製金剛般若波羅蜜經序

羽八

昔如來於舍衛城敷座說法與須菩提等演
 是金剛般若波羅蜜經以喻法爲名以實相
 爲體以無住爲宗以斷疑爲用以大乘爲教
 相其義甚深而明其說甚簡而切昔有領悟
 一言之旨者即成正果夫修六度萬行以造
 夫真如之地非由此經莫能以窺其徑庭蓋
 萬法本於一心以心求道道即是心心也者
 妙萬物而超萬物者也如來於此首指以示
 人非惟明顯其體而復彰喻其法是故無取
 於法而安住其心舍無上正等正覺其何以
 哉所以是經功德最大然不言其所以大其
 福果最勝然不言其所以勝有能因如是而
 得如來道者則知是人積累善根而成智慧
 所修福德即成勝果朕惟覺路非遙履之即

至人惟盡心以忠於君竭誠以孝於親不虧
六行不犯五刑不纏根塵心無妄想無所住
著即見本性不離宗旨又能持誦此經勤行
修習當即證大乘若彼頑嚚之徒積惡累愆
以墮惡趣苟能回心向善即得罪業消滅亦
即得超登彼岸蓋蠕動飛潛皆含佛性人心
最靈衆善斯具但根塵所汨喪其良心然善
者終於不泯有時發現因其發現之萌而致
力焉則善日長而惡日滅如淘沙取金沙去
而金出芟莠植苗莠除而苗盛夫爲善譬猶
登山益往益高爲惡譬猶走坂愈趨愈下善
人良士知善之可爲而益爲知惡之不可爲
而不爲則善愈積而惡愈消福愈盛而禍愈
遠煩惱不染於其心障業不繞於其體於如
來正覺夫何遠之有

永樂九年五月初一日

羽八

金剛般若波羅蜜經

姚秦三藏法師鳩摩羅什譯

如是我聞一時佛在舍衛國祇樹給孤獨園與大比丘衆千二百五十人俱爾時世尊食時著衣持鉢入舍衛大城乞食於其城中次第乞已還至本處飯食訖收衣鉢洗足已敷座而坐時長老須菩提在大衆中即從座起偏袒右肩右膝著地合掌恭敬而白佛言希有世尊如來善護念諸菩薩善付囑諸菩薩世尊善男子善女人發阿耨多羅三藐三菩提心云何應住云何降伏其心佛言善哉善哉須菩提如汝所說如來善護念諸菩薩善付囑諸菩薩汝今諦聽當爲汝說善男子善女人發阿耨多羅三藐三菩提心應如是住如是降伏其心唯然世尊願樂欲聞佛告須

菩提諸菩薩摩訶薩應如是降伏其心所有
一切衆生之類若卵生若胎生若濕生若化
生若有色若無色若有想若無想若非有想
非無想我皆令入無餘涅槃而滅度之如是
滅度無量無數無邊衆生實無衆生得滅度
者何以故須菩提若菩薩有我相人相衆生
相壽者相即非菩薩復次須菩提菩薩於法
應無所住行於布施所謂不住色布施不住
聲香味觸法布施須菩提菩薩應如是布施
不住於相何以故若菩薩不住相布施其福
德不可思量須菩提於意云何東方虛空可
思量不不也世尊須菩提南西北方四維上
下虛空可思量不不也世尊須菩提菩薩無
住相布施福德亦復如是不可思量須菩提
菩薩但應如所教住須菩提於意云何可以

身相見如來不不也世尊不可以身相得見
如來何以故如來所說身相即非身相佛告
須菩提凡所有相皆是虛妄若見諸相非相
則見如來須菩提白佛言世尊頗有衆生得
聞如是言說章句生實信不佛告須菩提莫
作是說如來滅後後五百歲有持戒修福者
於此章句能生信心以此爲實當知是人
於一佛二佛三四五佛而種善根已於無量
千萬佛所種諸善根聞是章句乃至一念生
淨信者須菩提如來悉知悉見是諸衆生得
如是無量福德何以故是諸衆生無復我相
人相衆生相壽者相無法相亦無非法相何
以故是諸衆生若心取相則爲著我人衆生
壽者若取法相即著我人衆生壽者何以故
若取非法相即著我人衆生壽者是故不應

取法不應取非法以是義故如來常說汝等
比丘知我說法如筏喻者法尚應捨何況非
法須菩提於意云何如來得阿耨多羅三藐
三菩提耶如來有所說法耶須菩提言如我
解佛所說義無有定法名阿耨多羅三藐三
菩提亦無有定法如來可說何以故如來所
說法皆不可取不可說非法非非法所以者
何一切賢聖皆以無爲法而有差別須菩提
於意云何若人滿三千大千世界七寶以用
布施是人所得福德寧爲多不須菩提言甚
多世尊何以故是福德即非福德性是故如
來說福德多若復有人於此經中受持乃至
四句偈等爲他人說其福勝彼何以故須菩
提一切諸佛及諸佛阿耨多羅三藐三菩提
法皆從此經出須菩提所謂佛法者即非佛

法須菩提於意云何須陀洹能作是念我得須陀洹果不須菩提言不也世尊何以故須陀洹名爲入流而無所入不入色聲香味觸法名須陀洹須菩提於意云何斯陀含能作是念我得斯陀含果不須菩提言不也世

尊何以故斯陀含名一往來而實無往來是名斯陀含須菩提於意云何阿那含能作是念我得阿那含果不須菩提言不也世尊何以故阿那含名爲不來而實無不來是故名阿那含須菩提於意云何阿羅漢能作是念

我得阿羅漢道不須菩提言不也世尊何以故實無有法名阿羅漢世尊若阿羅漢作是念我得阿羅漢道即爲著我人衆生壽者世尊佛說我得無諍三昧人中最爲第一是第

一離欲阿羅漢我不作是念我是離欲阿羅

漢世尊我若作是念我得阿羅漢道世尊則不說須菩提是樂阿蘭那行者以須菩提實無所行而名須菩提是樂阿蘭那行佛告須菩提於意云何如來昔在然燈佛所於法有所得不也世尊如來在然燈佛所於法實

無所得須菩提於意云何菩薩莊嚴佛土不也世尊何以故莊嚴佛土者即非莊嚴是名莊嚴是故須菩提諸菩薩摩訶薩應如是生清淨心不應住色生心不應住聲香味觸法生心應無所住而生其心須菩提譬如有

人身如須彌山王於意云何是身爲大不須菩提言甚大世尊何以故佛說非身是名大身須菩提如恒河中所有沙數如是沙等恒河於意云何是諸恒河沙寧爲多不須菩提言甚多世尊但諸恒河尚多無數何況其沙

須菩提我今實言告汝若有善男子善女人以七寶滿爾所恒河沙數三千大千世界以用布施得福多不須菩提言甚多世尊佛告須菩提若善男子善女人於此經中乃至受持四句偈等爲他人說而此福德勝前福德復次須菩提隨說是經乃至四句偈等當知此處一切世間天人阿修羅皆應供養如佛塔廟何況有人盡能受持讀誦須菩提當知是人成就最上第一希有之法若是經典所在之處即爲有佛若尊重弟子爾時須菩提

羽八

六

白佛言世尊當何名此經我等云何奉持佛告須菩提是經名爲金剛般若波羅蜜以是名字汝當奉持所以者何須菩提佛說般若波羅蜜即非般若波羅蜜須菩提於意云何如來有所說法不須菩提白佛言世尊如來無所說須菩提於意云何三千大千世界所有微塵是爲多不須菩提言甚多世尊須菩提諸微塵如來說非微塵是名微塵如來說世界非世界是名世界須菩提於意云何可以三十二相見如來不也世尊不可以三十二相得見如來何以故如來說三十二相即是非相是名三十二相須菩提若有善男子善女人以恒河沙等身命布施若復有人於此經中乃至受持四句偈等爲他人說其福甚多爾時須菩提聞說是經深解義趣涕淚悲泣而白佛言希有世尊佛說如是甚深經典我從昔來所得慧眼未曾得聞如是之經世尊若復有人得聞是經信心清淨則生實相當知是人成就第一希有功德世尊是實相者則是非相是故如來說名實相世尊

我今得聞如是經典信解受持不足爲難若當來世後五百歲其有衆生得聞是經信解受持是人則爲第一希有何以故此人無我相人相衆生相壽者相所以者何我相即是非相人相衆生相壽者相即是非相何以故離一切諸相則名諸佛佛告須菩提如是如是若復有人得聞是經不驚不怖不畏當知是人甚爲希有何以故須菩提如來說第一波羅蜜即非第一波羅蜜是名第一波羅蜜須菩提忍辱波羅蜜如來說非忍辱波羅蜜何以故須菩提如我昔爲歌利王割截身體我於爾時無我相無人相無衆生相無壽者相何以故我於往昔節節支解時若有我相人相衆生相壽者相應生瞋恨須菩提又念過去於五百世作忍辱仙人於爾所世無我

相無人相無衆生相無壽者相是故須菩提菩薩應離一切相發阿耨多羅三藐三菩提心不應住色生心不應住聲香味觸法生心應生無所住心若心有住則爲非住是故佛說菩薩心不應住色布施須菩提菩薩爲利益一切衆生應如是布施如來說一切諸相即是非相又說一切衆生即非衆生須菩提如來是真語者實語者如語者不誑語者不異語者須菩提如來所得法此法無實無虛須菩提若菩薩心住於法而行布施如人入闇則無所見若菩薩心不住法而行布施如人有目日光明照見種種色須菩提當來之世若有善男子善女人能於此經受持讀誦則爲如來以佛智慧悉知是人悉見是人皆得成就無量無邊功德須菩提若有善男子

善女人初日分以恒河沙等身布施中日分復以恒河沙等身布施後日分亦以恒河沙等身布施如是無量百千萬億劫以身布施若復有人聞此經典信心不逆其福勝彼何況書寫受持讀誦爲人解說須菩提以要言之是經有不可思議不可稱量無邊功德如來爲發大乘者說爲發最上乘者說若有人能受持讀誦廣爲人說如來悉知是人悉見是人皆得成就不可量不可稱無有邊不可思議功德如是人等則爲荷擔如來阿耨多羅三藐三菩提何以故須菩提若樂小法者著我見人見衆生見壽者見則於此經不能聽受讀誦爲人解說須菩提在在處處若有此經一切世間天人阿修羅所應供養當知此處則爲是塔皆應恭敬作禮圍繞以諸華

香而散其處復次須菩提善男子善女人受持讀誦此經若爲人輕賤是人先世罪業應墮惡道以今世人輕賤故先世罪業則爲消滅當得阿耨多羅三藐三菩提須菩提我念過去無量阿僧祇劫於然燈佛前得值八百四八四千萬億那由他諸佛悉皆供養承事無空過者若復有人於後末世能受持讀誦此經所得功德於我所供養諸佛功德百分不及一千萬億分乃至算數譬喻所不能及須菩提若善男子善女人於後末世有受持讀誦此經所得功德我若具說者或有人聞心則狂亂狐疑不信須菩提當知是經義不可思議果報亦不可思議爾時須菩提白佛言世尊善男子善女人發阿耨多羅三藐三菩提心云何應住云何降伏其心佛告須菩提善

男子善女人發阿耨多羅三藐三菩提心者當生如是心我應滅度一切衆生滅度一切衆生已而無有一衆生實滅度者何以故須菩提若菩薩有我相人相衆生相壽者相則非菩薩所以者何須菩提實無有法發阿耨多羅三藐三菩提心者須菩提於意云何如來於然燈佛所有法得阿耨多羅三藐三菩提不不也世尊如我解佛所說義佛於然燈佛所無有法得阿耨多羅三藐三菩提佛言如是如是須菩提實無有法如來得阿耨多羅三藐三菩提須菩提若有法如來得阿耨多羅三藐三菩提者然燈佛則不與我授記汝於來世當得作佛號釋迦牟尼以實無有法得阿耨多羅三藐三菩提是故然燈佛與我授記作是言汝於來世當得作佛號釋迦

牟尼何以故如來者即諸法如義若有人言如來得阿耨多羅三藐三菩提須菩提實無有法佛得阿耨多羅三藐三菩提須菩提如來所得阿耨多羅三藐三菩提於是中無實無虛是故如來說一切法皆是佛法須菩提所言一切法者即非一切法是故名一切法須菩提譬如人身長大須菩提言世尊如來說人身長大則爲非大身是名大身須菩提菩薩亦如是若作是言我當滅度無量衆生則不名菩薩何以故須菩提實無有法名爲菩薩是故佛說一切法無我無人無衆生無壽者須菩提若菩薩作是言我當莊嚴佛土是不名菩薩何以故如來說莊嚴佛土者即非莊嚴是名莊嚴須菩提若菩薩通達無我法者如來說名真是菩薩須菩提於意云何

如來有肉眼不如是世尊如來有肉眼須菩提於意云何如來有天眼不如是世尊如來有天眼須菩提於意云何如來有慧眼不如是世尊如來有慧眼須菩提於意云何如來有法眼不如是世尊如來有法眼須菩提於

意云何如來有佛眼不如是世尊如來有佛眼須菩提於意云何如恒河中所有沙佛說是沙不如是世尊如來說是沙須菩提於意云何如一恒河中所有沙有如是沙等恒河是諸恒河所有沙數佛世界如是寧為多不

甚多世尊佛告須菩提爾所國土中所有眾生若干種心如來悉知何以故如來說諸心皆為非心是名為心所以者何須菩提過去心不可得現在心不可得未來心不可得須菩提於意云何若有人滿三千大千世界七

寶以用布施是人以是因緣得福多不如是世尊此人以是因緣得福甚多須菩提若福德有實如來不說得福德多以福德無故如來說得福德多須菩提於意云何佛可以具足色身見不不也世尊如來不應以具足色

身見何以故如來說具足色身即非具足色身是名具足色身須菩提於意云何如來可以具足諸相見不不也世尊如來不應以具足諸相見何以故如來說諸相具足即非具足是名諸相具足須菩提汝勿謂如來作是念我當有所說法莫作是念何以故若人言如來有所說法即為謗佛不能解我所說故須菩提說法者無法可說是名說法爾時慧命須菩提白佛言世尊頗有眾生於未來世聞說是法生信心不佛言須菩提彼非眾生

非不衆生何以故須菩提衆生衆生者如來說非衆生是名衆生須菩提白佛言世尊佛得阿耨多羅三藐三菩提爲無所得耶佛言如是如是須菩提我於阿耨多羅三藐三菩提乃至無有少法可得是名阿耨多羅三藐三菩提復次須菩提是法平等無有高下是名阿耨多羅三藐三菩提以無我無人無衆生無壽者修一切善法則得阿耨多羅三藐三菩提須菩提所言善法者如來說即非善法是名善法須菩提若三千大千世界中所有諸須彌山王如是等七寶聚有人持用布施若人以此般若波羅蜜經乃至四句偈等受持讀誦爲他人說於前福德百分不及一百千萬億分乃至算數譬喻所不能及須菩提於意云何汝等勿謂如來作是念我當度

十八

十二

衆生須菩提莫作是念何以故實無有衆生如來度者若有衆生如來度者如來則有我人衆生壽者須菩提如來說有我者則非有我而凡夫之人以爲有我須菩提凡夫者如來說則非凡夫須菩提於意云何可以三十二相觀如來不須菩提言如是如是以三十二相觀如來佛言須菩提若以三十二相觀如來者轉輪聖王則是如來須菩提白佛言世尊如我解佛所說義不應以三十二相觀如來爾時世尊而說偈言

若以色見我 以音聲求我 是人行邪道 不能見如來

須菩提汝若作是念如來不以具足相故得阿耨多羅三藐三菩提須菩提莫作是念如來不以具足相故得阿耨多羅三藐三菩提

須菩提汝若作是念發阿耨多羅三藐三菩提心者說諸法斷滅莫作是念何以故發阿耨多羅三藐三菩提心者於法不說斷滅相須菩提若菩薩以滿恒河沙等世界七寶持用布施若復有人知一切法無我得成於忍

此菩薩勝前菩薩所得功德何以故須菩提以諸菩薩不受福德故須菩提白佛言世尊云何菩薩不受福德須菩提菩薩所作福德不應貪著是故說不受福德須菩提若有人言如來若來若去若坐若卧是人不解我所說義何以故如來者無所從來亦無所去故名如來須菩提若善男子善女人以三千大千世界碎爲微塵於意云何是微塵衆寧爲多不甚多世尊何以故若是微塵衆實有者佛則不說是微塵衆所以者何佛說微塵衆

則非微塵衆是名微塵衆世尊如來所說三千大千世界則非世界是名世界何以故若世界實有者則是一合相如來說一合相則非一合相是名一合相須菩提一合相者則是不可說但凡夫之人貪著其事須菩提若

人言佛說我見人見衆生見壽者見須菩提於意云何是人解我所說義不不也世尊是人不解如來所說義何以故世尊說我見人見衆生見壽者見即非我見人見衆生見壽者見是名我見人見衆生見壽者見須菩提發阿耨多羅三藐三菩提心者於一切法應如是知如是見如是信解不生法相須菩提所言法相者如來說即非法相是名法相須菩提若有人以滿無量阿僧祇世界七寶持用布施若有善男子善女人發菩薩心者持

於此經乃至四句偈等受持讀誦為人演說
 其福勝彼云何為人演說不取於相如如不
 動何以故
 一切有為法 如夢幻泡影 如露亦如電
 應作如是觀
 佛說是經已長老須菩提及諸比丘比丘尼
 優婆塞優婆夷一切世間天人阿修羅聞佛
 所說皆大歡喜信受奉行

金剛般若波羅蜜經

音釋

序

窺缺規切 徑庭他定切 頑頑五還切
 則德義之經為頑 蠕乳充切 汨汨喪切
 汨古忽切 淘徒刀切 艾艾師街切
 長四浪切 失也 澄澄汰也 艾艾師街切
 除草也 艾艾師街切

以九切狗
 厄草也 坂甫速切 坂者曰坂

經

飯食飯父遠切餐飯也 袒蕩旱切 諦聽諦丁計切謂
 唯愈水切恭願樂 願樂樂魚教切 量不張切
 應之詞也願 量不張切 唯然唯然
 九切可不 不也不 支解解舉蟹
 謂支節荷擔 荷擔荷胡可切擔都甘 泡披交切
 分也也 荷擔荷胡可切擔都甘 泡披交切
 也也 荷擔荷胡可切擔都甘 泡披交切

金剛般若波羅蜜經

羽九

元 魏 三 藏 留 支 譯

序分第一

如是我聞一時婆伽婆在舍婆提城祇樹給
孤獨園與大比丘衆千二百五十人俱爾時
世尊食時著衣持鉢入舍婆提大城乞食於
其城中次第乞食已還至本處飯食訖收衣
鉢洗足已如常敷座結跏趺坐端身而住正
念不動

護念付囑分第二

爾時諸比丘來詣佛所到已頂禮佛足右遶
三匝退坐一面爾時慧命須菩提在大衆中
即從座起偏袒右肩右膝著地向佛合掌恭
敬而立白佛言希有世尊如來應供正徧知
善護念諸菩薩善付囑諸菩薩

住分第三

世尊云何菩薩大乘中發阿耨多羅三藐三
菩提心應云何住云何修行云何降伏其心
爾時佛告須菩提善哉善哉須菩提如汝所
說如來善護念諸菩薩善付囑諸菩薩汝今
諦聽當為汝說如菩薩大乘中發阿耨多羅
三藐三菩提心應如是住如是修行如是降
伏其心須菩提白佛言世尊如是願樂欲聞
佛告須菩提諸菩薩生如是心所有一切衆
生衆生所攝若卵生若胎生若濕生若化生
若有色若無色若有想若無想若非有想非
無想所有衆生界衆生所攝我皆令入無餘
涅槃而滅度之如是滅度無量無邊衆生實
無衆生得滅度者何以故須菩提若菩薩有
衆生相即非菩薩何以故非須菩提若菩薩

起衆生相人相壽者相則不名菩薩

如實修行分第四

復次須菩提菩薩不住於事行於布施無所
住行於布施不住色布施不住聲香味觸法
布施須菩提菩薩應如是布施不住於相想

羽九

二

何以故若菩薩不住相布施其福德聚不可
思量須菩提於汝意云何東方虛空可思量
不須菩提言不也世尊佛言如是須菩提南
西北方四維上下虛空可思量不須菩提言
不也世尊佛言如是如是須菩提菩薩無住
相布施福德聚亦復如是不可思量佛復告
須菩提菩薩但應如是行於布施
如來非有爲分第五
須菩提於意云何可以相成就見如來不須
菩提言不也世尊不可以相成就得見如來

何以故如來所說相即非相佛告須菩提凡
所有相皆是妄語若見諸相非相則非妄語
如是諸相非相則見如來

我空法分第六

須菩提白佛言世尊頗有衆生於未來世末

世得聞如是修多羅章句生實相不佛告須
菩提莫作是說頗有衆生於未來世末世得
聞如是修多羅章句生實相不佛復告須菩
提有未來世末世有菩薩摩訶薩法欲滅時
有持戒修福德智慧者於此修多羅章句能
生信心以此爲實佛復告須菩提當知彼菩
薩摩訶薩非於一佛二佛三四五佛所修行
供養非於一佛二佛三四五佛所而種善根
佛復告須菩提已於無量百千萬諸佛所修
行供養無量百千萬諸佛所種諸善根聞是

羽九

三

修多羅乃至一念能生淨信須菩提如來悉知是諸衆生如來悉見是諸衆生須菩提是諸菩薩生如是無量福德聚取如是無量福德何以故須菩提是諸菩薩無復我相衆生相人相壽者相須菩提是諸菩薩無法相亦非無法相無相亦非無相何以故須菩提是諸菩薩若取法相則爲著我人衆生壽者須菩提若是菩薩有法相即著我人相衆生相壽者相何以故須菩提不應取法非不取法以是義故如來常說筏喻法門是法應捨非捨法故復次佛告慧命須菩提須菩提於意云何如來得阿耨多羅三藐三菩提耶如來有所說法耶須菩提言如我解佛所說義無有定法如來得阿耨多羅三藐三菩提亦無有定法如來可說何以故如來所說法皆

不可取不可說非法非非法何以故一切聖人皆以無爲法得名

具足功德校量分第七

須菩提於意云何若滿三千大千世界七寶以用布施須菩提於意云何是善男子善女人所得福德寧爲多不須菩提言甚多婆伽婆甚多修伽陀彼善男子善女人得福甚多何以故世尊是福德聚即非福德聚是故如來說福德聚福德聚佛言須菩提若善男子善女人以滿三千大千世界七寶持用布施羽九若復於此經中受持乃至四句偈等爲他人說其福勝彼無量不可數何以故須菩提一切諸佛阿耨多羅三藐三菩提法皆從此經出一切諸佛如來皆從此經生須菩提所謂佛法佛法者即非佛法是名佛法須菩提於

意云何須陀洹能作是念我得須陀洹果不須菩提言不也世尊何以故實無有法名須陀洹不入色聲香味觸法是名須陀洹佛言須菩提於意云何斯陀舍能作是念我得斯陀舍果不須菩提言不也世尊何以故實無有法名斯陀舍是名斯陀舍須菩提於意云何阿那舍能作是念我得阿那舍果不須菩提言不也世尊何以故實無有法名阿那舍是名阿那舍須菩提於意云何阿羅漢能作是念我得阿羅漢果不須菩提言不也世尊何以故實無有法名阿羅漢世尊若阿羅漢作是念我得阿羅漢即爲著我人衆生壽者世尊佛說我得無諍三昧最爲第一世尊說我是離欲阿羅漢世尊我不作是念我是離欲阿羅漢世尊我若作是念我得阿羅漢世

尊則不說我無諍行第一以須菩提實無所行而名須菩提無諍無諍行佛告須菩提於意云何如來昔在然燈佛所得阿耨多羅三藐三菩提法不須菩提言不也世尊如來在然燈佛所於法實無所得阿耨多羅三藐三菩提佛告須菩提若菩薩作是言我莊嚴佛國土彼菩薩不實語何以故須菩提如來所說莊嚴佛土者則非莊嚴是名莊嚴佛土是故須菩提諸菩薩摩訶薩應如是生清淨心而無所住不住色生心不住聲香味觸法生心應無所住而生其心須菩提譬如有人身如須彌山王須菩提於意云何是身爲大不須菩提言甚大世尊何以故佛說非身是名大身彼身非身是名大身佛言須菩提如恒河中所有沙數如是沙等恒河於意云何是

諸恒河沙寧爲多不須菩提言甚多世尊但諸恒河尚多無數何況其沙佛言須菩提我今實言告汝若有善男子善女人以七寶滿爾所恒河沙數世界以施諸佛如來須菩提於意云何彼善男子善女人得福多不須菩提言甚多世尊彼善男子善女人得福甚多佛告須菩提以七寶滿爾所恒河沙世界持用布施若善男子善女人於此法門乃至受持四句偈等爲他人說而此福德勝前福德無量阿僧祇復次須菩提隨所有處說是法門乃至四句偈等當知此處一切世間天人阿修羅皆應供養如佛塔廟何況有人盡能受持讀誦此經須菩提當知是人成就最上第一希有之法若是經典所在之處則爲有佛若尊重似佛爾時須菩提白佛言世尊當

何名此法門我等云何奉持佛告須菩提是法門名爲金剛般若波羅蜜以是名字汝當奉持何以故須菩提佛說般若波羅蜜則非般若波羅蜜須菩提於意云何如來有所說法不須菩提言世尊如來無所說法須菩提於意云何三千大千世界所有微塵是爲多不須菩提言彼微塵甚多世尊須菩提是諸微塵如來說非微塵是名微塵如來說世界非世界是名世界佛言須菩提於意云何可以三十二大人相見如來不須菩提言不也世尊何以故如來說三十二大人相即是非相是名三十二大人相佛言須菩提若有善男子善女人以恒河沙等身命布施若復有人於此法門中乃至受持四句偈等爲他人說其福甚多無量阿僧祇爾時須菩提聞說

是經深解義趣涕淚悲泣捫淚而白佛言希有婆伽婆希有修伽陀佛說如是甚深法門我從昔來所得慧眼未曾得聞如是法門何以故須菩提佛說般若波羅蜜即非般若波羅蜜世尊若復有人得聞是經信心清淨則

羽九

七

生實相當知是人成就第一希有功德世尊是實相者則是非相是故如來說名實相實相世尊我今得聞如是法門信解受持不足為難若當來世其有眾生得聞是法門信解受持是人則為第一希有何以故此人無我相人相眾生相壽者相何以故我相即是非相人相眾生相壽者相即是非相何以故離一切諸相則名諸佛佛告須菩提如是如是若復有人得聞是經不驚不怖不畏當知是人甚為希有何以故須菩提如來說第一波

羅蜜非第一波羅蜜如來說第一波羅蜜者彼無量諸佛亦說波羅蜜是名第一波羅蜜須菩提如來說忍辱波羅蜜即非忍辱波羅蜜何以故須菩提如我昔為歌利王割截身體我於爾時無我相無眾生相無人相無壽者相無相亦非無相何以故須菩提我於往昔節節支解時若有我相眾生相人相壽者相應生瞋恨須菩提又念過去於五百世作忍辱仙人於爾所世無我相無眾生相無人相無壽者相是故須菩提菩薩應離一切相發阿耨多羅三藐三菩提心何以故若心有住則為非住不應住色生心不應住聲香味觸法生心應生無所住心是故佛說菩薩心不住色布施須菩提菩薩為利益一切眾生應如是布施須菩提言世尊一切眾生相即

是非相何以故如來說一切衆生即非衆生
須菩提如來是真語者實語者如語者不異
語者須菩提如來所得法所說法無實無妄
語

真如分第八

羽九

須菩提譬如有人入闇則無所見若菩薩心
住於事而行布施亦復如是須菩提譬如人
有日夜分已盡日光明照見種種色若菩薩
不住於事行於布施亦復如是復次須菩提
若有善男子善女人能於此法門受持讀誦
修行則爲如來以佛智慧悉知是人悉見是
人悉覺是人皆得成就無量無邊功德聚須
菩提若有善男子善女人初日分以恒河沙
等身布施中日分復以恒河沙等身布施後
日分復以恒河沙等身布施如是捨恒河沙

等無量身如是百千萬億那由他劫以身布
施若復有人聞此法門信心不謗其福勝彼
無量阿僧祇何況書寫受持讀誦修行爲人
廣說

利益分第九

須菩提以要言之是經有不可思議不可稱
量無邊功德此法門如來爲發大乘者說爲
發最上乘者說若有人能受持讀誦修行此
經廣爲人說如來悉知是人悉見是人皆成
就不可思議不可稱無有邊無量功德聚如
是人等則爲荷擔如來阿耨多羅三藐三菩
提何以故須菩提若樂小法者則於此經不
能受持讀誦修行爲人解說若有我見衆生
見人見壽者見於此法門能受持讀誦修行
爲人解說者無有是處須菩提在在處處若

有此經一切世間天人阿修羅所應供養當知此處則爲是塔皆應恭敬作禮圍遶以諸華香而散其處復次須菩提若善男子善女人受持讀誦此經爲人輕賤何以故是人先世罪業應墮惡道以今世人輕賤故先世罪業則爲消滅當得阿耨多羅三藐三菩提須菩提我念過去無量阿僧祇阿僧祇劫於然燈佛前得值八十四億那由他百千萬諸佛我皆親承供養無空過者須菩提如是無量諸佛我皆親承供養無空過者若復有人於後世末世能受持讀誦修行此經所得功德我所供養諸佛功德於彼百分不及一千萬億分乃至算數譬喻所不能及須菩提若有善男子善女人於後世末世有受持讀誦修行此經所得功德若我具說者或有人聞心

則狂亂疑惑不信須菩提當知是法門不可思議果報亦不可思議

斷疑分第十

爾時須菩提白佛言世尊云何菩薩發阿耨多羅三藐三菩提心云何住云何修行云何降伏其心佛告須菩提菩薩發阿耨多羅三藐三菩提心者當生如是心我應滅度一切衆生今入無餘涅槃界如是滅度一切衆生已而無一衆生實滅度者何以故須菩提若菩薩有衆生相人相壽者相則非菩薩何以故須菩提實無有法名爲菩薩發阿耨多羅三藐三菩提心者須菩提於意云何如來於然燈佛所有法得阿耨多羅三藐三菩提不須菩提白佛言不也世尊如我解佛所說義佛於然燈佛所無有法得阿耨多羅三藐三

菩提佛言如是如是須菩提實無有法如來於然燈佛所得阿耨多羅三藐三菩提須菩提若有法如來得阿耨多羅三藐三菩提者然燈佛則不與我受記汝於來世當得作佛號釋迦牟尼以實無有法得阿耨多羅三藐三菩提是故然燈佛與我受記作如是言摩那婆汝於來世當得作佛號釋迦牟尼何以故須菩提言如來者即實真如須菩提若有人言如來得阿耨多羅三藐三菩提者是人實語須菩提實無有法佛得阿耨多羅三藐三菩提須菩提如來所得阿耨多羅三藐三菩提於是中不實不妄語是故如來說一切法皆是佛法須菩提所言一切法一切法者即非一切法是故名一切法須菩提譬如有人其身妙大須菩提言世尊如來說人身

妙大即非大身是故如來說名大身佛言須菩提菩薩亦如是若作是言我當滅度無量衆生則非菩薩佛言須菩提於意云何頗有實法名爲菩薩不須菩提言不也世尊實無有法名爲菩薩是故佛說一切法無衆生無人無壽者須菩提若菩薩作是言我莊嚴佛國土是不名菩薩何以故如來說莊嚴佛土莊嚴佛土者即非莊嚴是名莊嚴佛國土須菩提若菩薩通達無我無法者如來說名真實菩薩須菩提於意云何如來有肉眼不須菩提言如是世尊如來有肉眼佛言須菩提於意云何如來有天眼佛言須菩提於意云何如來有慧眼不須菩提言如是世尊如來有慧眼佛言須菩提於意云何如來有法眼不須

菩提言如是世尊如來有法眼佛言須菩提於意云何如來有佛眼不須菩提言如是世尊如來有佛眼佛言須菩提於意云何如恒河中所有沙佛說是沙不須菩提言如是世尊如來說是沙佛言須菩提於意云何如一

恒河中所有沙有如是等恒河是諸恒河所有沙數佛世界如是世界寧爲多不須菩提言彼世界甚多世尊佛言須菩提爾所世界中所有衆生若干種心住如來悉知何以故如來說諸心住皆爲非心住是名爲心住何以故須菩提過去心不可得現在心不可得未來心不可得須菩提於意云何若有人以滿三千大千世界七寶持用布施是善男子善女人以是因緣得福多不須菩提言如是世尊此人以是因緣得福甚多佛言如是如

是須菩提彼善男子善女人以是因緣得福德聚多須菩提若福德聚有實如來則不說福德聚福德聚須菩提於意云何佛可以具足色身見不須菩提言不也世尊如來不應以色身見何以故如來說具足色身即非具足色身是故如來說名具足色身佛言須菩提於意云何如來可以具足諸相見不須菩提言不也世尊如來不應以具足諸相見何以故如來說諸相具足即非具足是故如來說名諸相具足佛言須菩提於意云何汝謂如來作是念我當有所說法耶須菩提莫作是念何以故若人言如來有所說法即爲謗佛不能解我所說故何以故須菩提如來說法說法者無法可說是名說法爾時慧命須菩提白佛言世尊頗有衆生於未來世聞說

是法生信心不佛言須菩提彼非衆生非不
衆生何以故須菩提衆生衆生者如來說非
衆生是名衆生佛言須菩提於意云何如來
得阿耨多羅三藐三菩提耶須菩提言不也
世尊世尊無有少法如來得阿耨多羅三藐
三菩提佛言如是如是須菩提我於阿耨多
羅三藐三菩提乃至無有少法可得是名阿
耨多羅三藐三菩提復次須菩提是法平等
無有高下是名阿耨多羅三藐三菩提以無
衆生無人無壽者得平等阿耨多羅三藐三
菩提一切善法得阿耨多羅三藐三菩提須
菩提所言善法善法者如來說非善法是名
善法須菩提三千大千世界中所有諸須彌
山王如是等七寶聚有人持用布施若人以
此般若波羅蜜經乃至四句偈等受持讀誦

十三

羽九

爲他人說於前福德百分不及一千分不及
一百千萬分不及一歌羅分不及一數分不
及一優波尼沙陀分不及一乃至算數譬喻
所不能及須菩提於意云何汝謂如來作是
念我度衆生耶須菩提莫作是念何以故實
無有衆生如來度者佛言須菩提若有實衆
生如來度者如來則有我人衆生壽者相須
菩提如來說有我者則非有我而毛道凡夫
生者以爲有我須菩提毛道凡夫生者如來
說名非生是故言毛道凡夫生須菩提於意
云何可以相成就得見如來不須菩提言如
我解如來所說義不以相成就得見如來佛
言如是如是須菩提不以相成就得見如來
佛言須菩提若以相成就觀如來者轉輪聖
王應是如來是故非以相成就得見如來爾

時世尊而說偈言

若以色見我 以音聲求我 是人行邪道

不能見如來 彼如來妙體 即法身諸佛

法體不可見 彼識不能知

須菩提於意云何如來可以相成就得阿耨

多羅三藐三菩提耶須菩提莫作是念如來

以相成就得阿耨多羅三藐三菩提須菩提

汝若作是念菩薩發阿耨多羅三藐三菩提

心者說諸法斷滅相須菩提莫作是念菩薩

發阿耨多羅三藐三菩提心說諸法斷滅相

何以故菩薩摩訶薩發阿耨多羅三藐三菩

提心者於法不說斷滅相故須菩提若善男

子善女人以滿恒河沙等世界七寶持用布

施若有菩薩知一切法無我得無生法忍此

功德勝前所得福德須菩提以諸菩薩不取

福德故須菩提白佛言世尊菩薩不取福德

佛言須菩提菩薩受福德不取福德是故菩

薩取福德須菩提若有人言如來若去若來

若住若坐若卧是人不解我所說義何以故

如來者無所至去無所從來故名如來須菩

提若善男子善女人以三千大千世界微塵

復以爾許微塵世界碎為微塵阿僧祇須菩

提於意云何是微塵眾寧為多不須菩提言

彼微塵眾甚多世尊何以故若是微塵眾實

有者佛則不說是微塵眾何以故佛說微塵

眾則非微塵眾是故佛說微塵眾世尊如來

所說三千大千世界則非世界是故佛說三

千大千世界何以故若世界實有者則是一

合相如來說一合相則非一合相是故佛說

一合相佛言須菩提一合相者則是不可說

羽九

十四

羽九

十五

但凡夫之人貪著其事何以故須菩提若人如是言佛說我見人見衆生見壽者見須菩提於意云何是人所說爲正語不須菩提言不也世尊何以故世尊如來說我見人見衆生見壽者見即非我見人見衆生見壽者見是名我見人見衆生見壽者見須菩提菩薩發阿耨多羅三藐三菩提心者於一切法應如是知如是見如是信如是不住法相何以故須菩提所言法相法相者如來說即非法相是名法相須菩提若有菩薩摩訶薩以滿無量阿僧祇世界七寶持用布施若有善男子善女人發菩薩心者於此般若波羅蜜經乃至四句偈等受持讀誦爲他人說其福勝彼無量阿僧祇云何爲人演說而不名說是名爲說爾時世尊而說偈言

不住道分第十一
一切有爲法 如星翳燈幻 露泡夢電雲
應作如是觀
流通分第十二
佛說是經已長老須菩提及諸比丘比丘尼
優婆塞優婆夷菩薩摩訶薩一切世間天人
阿修羅乾闥婆等聞佛所說皆大歡喜信受
奉行

金剛般若波羅蜜經

音釋

筏 房越切 薄也 大 捫 捫音門 捫也 割 割居
截昨結切 閻烏紺切 翳於計切
割裁斷也 閻冥也 翳障也

羽九

十六

金剛般若波羅蜜經

羽十

陳天竺三藏法師真諦譯

如是我聞一時佛婆伽婆住舍衛國祇陀樹林給孤獨園與大比丘衆千二百五十人俱爾時世尊於日前分著衣持鉢入舍衛大國而行乞食於其國中次第行已還至本處飯羽十食事訖於中後時收衣鉢洗足已如常敷座跏趺安坐端身而住正念現前時諸比丘俱往佛所至佛所已頂禮佛足右繞三匝却坐一面爾時淨命須菩提於大衆中共坐聚集時淨命須菩提即從座起偏袒右肩頂禮佛足右膝著地向佛合掌而白佛言希有世尊如來應供正徧覺知善護念諸菩薩摩訶薩由無上利益故善付囑諸菩薩摩訶薩由無上教故世尊若善男子善女人發阿耨多羅

三藐三菩提心行菩薩乘云何應住云何修行云何發起菩薩心淨命須菩提作是問已爾時世尊告須菩提須菩提善哉善哉如是善男子如來善護念諸菩薩摩訶薩無上利益故善付囑諸菩薩摩訶薩無上教故須菩提是故汝今一心諦聽恭敬善思念之我今當爲汝說如菩薩發菩提心行菩薩乘如是應住如是修行如是發心須菩提言唯然世尊佛告須菩提須菩提若善男子善女人發菩提心行菩薩乘應如是發心所有一切衆生類攝若卵生若胎生若濕生若化生若有色若無色若有想若無想若非有想若非無想乃至衆生界及假名說如是衆生我皆安置於無餘涅槃如是般涅槃無量衆生已無一衆生被涅槃者何以故須菩提若菩薩有

衆生想即不應說名爲菩薩何以故須菩提
一切菩薩無我想衆生想壽者想受者想復
次須菩提菩薩不著已類而行布施不著所
餘行於布施不著色聲香味觸法應行布施
須菩提菩薩應如是行施不著相想何以故
須菩提若菩薩無執著心行於布施是福德
聚不可數量須菩提汝意云何東方虛空可
數量不須菩提言不可世尊佛言如是須菩
提南西北方四維上下十方虛空可數量不
須菩提言不可世尊佛言如是須菩提若菩
薩無執著心行於布施是福德聚亦復如是
不可數量須菩提汝意云何可以身相勝德
見如來不不也世尊何以故如來所說身相
勝德非相勝德何以故須菩提凡所有相皆
是虛妄無所有相即是真實由相無相應見

如來如是說已淨命須菩提白佛言世尊於
今現時及未來世頗有菩薩聽聞正說如是
等相此經章句生實想不佛告須菩提莫作
是說於今現時及未來世頗有菩薩聽聞正
說如是等相此經章句生實想不何以故須
菩提於未來世實有衆生得聞此經能生實
想復次須菩提於未來世後五百歲正法滅
時有諸菩薩摩訶薩持戒修福及有智慧須
菩提是諸菩薩摩訶薩非事一佛非於一佛
種諸善根已事無量百千諸佛已於無量百
千佛所而種善根若有善男子善女人聽聞
正說如是等相此經章句乃至一念生實信
者須菩提如來悉知是人悉見是人須菩提
是善男子善女人生長無量福德之聚何以
故須菩提是諸菩薩無復我想衆生想壽者

想受者想是諸菩薩無法想無非法想無想無非想何以故須菩提是諸菩薩若有法想即是我執及衆生壽者受者執須菩提是故菩薩不應取法不應取非法爲如是義故如來說若觀行人解筏喻經法尚應捨何況非法佛復告淨命須菩提須菩提汝意云何如來得阿耨多羅三藐三菩提耶如來有所說法耶須菩提言如我解佛所說義無所有法如來所得名阿耨多羅三藐三菩提亦無有法如來所說何以故是法如來所說不可取不可言非法非非法何以故一切聖人皆以無爲真如所顯現故須菩提汝意云何以三千大千世界遍滿七寶若人持用布施是善男子善女人因此布施福多不須菩提言甚多世尊甚多修伽陀是善男子善女人因

此布施得福甚多何以故世尊此福德聚即非福德聚是故如來說福德聚佛言須菩提若善男子善女人以三千大千世界遍滿七寶持用布施若復有人從此經中受四句偈爲他正說顯示其義此人以是因緣所生福德最多於彼無量無數何以故須菩提如來無上菩提從此福成諸佛世尊從此福生何以故須菩提所言佛法者即非佛法是名佛法須菩提汝意云何須陀洹能作是念我得須陀洹果不須菩提言不也世尊何以故世尊實無所有能至於流故說須陀洹乃至色聲香味觸法亦復如是故名須陀洹斯陀舍名一往來實無所有能至往來是名斯陀舍阿那含名爲不來實無所有能至不來是名阿那含佛言須菩提汝意云何阿羅漢能作

是念我得阿羅漢果不須菩提言不也世尊
何以故實無所有名阿羅漢世尊若阿羅漢
作是念我得阿羅漢果此念即是我執衆生
執壽者執受者執世尊如來阿羅訶三藐三
佛陀讚我住無諍三昧人中最爲第一世尊
我今已成阿羅漢離三有欲世尊我亦不作
是念我是阿羅漢世尊我若有是念我已得
阿羅漢果如來則應不授我記住無諍三昧
人中須菩提善男子最爲第一實無所住住
於無諍住於無諍佛告須菩提汝意云何昔
從然燈如來阿羅訶三藐三佛陀所頗有一
法如來所取不須菩提言不也世尊實無有
法昔從然燈如來阿羅訶三藐三佛陀所如
來所取佛告須菩提若有菩薩作如是言我
當莊嚴清淨佛土而此菩薩說虛妄言何以

故須菩提莊嚴佛土者如來說非莊嚴是故
莊嚴清淨佛土須菩提是故菩薩應生如是
無住著心不住色聲香味觸法生心應無所
住而生其心須菩提譬如有人體相勝大如
須彌山王須菩提汝意云何如是體相爲勝
大不須菩提言甚大世尊何以故如來說非
有名爲有身此非是有故說有身佛告須菩
提汝意云何於恒伽江所有諸沙如其沙數
所有恒伽諸恒伽沙寧爲多不須菩提言甚
多世尊但諸恒伽尚多無數何況其沙佛言
須菩提我今覺汝我今示汝諸恒伽中所有
沙數如是沙等世界若有善男子善女人以
七寶遍滿持施如來應供正遍覺知須菩提
汝意云何此人以是因緣得福多不須菩提
言甚多世尊甚多修伽陀此人以是因緣生

福甚多須菩提若善男子善女人以七寶遍滿爾所恒伽沙世界持用布施若善男子善女人從此經典乃至四句偈等恭敬受持爲他正說是人所生福德最勝於彼無量無數復次須菩提隨所在處若有人能從是經典乃至四句偈等讀誦講說當知此處於世間中即成支提一切人天阿修羅等皆應恭敬何況有人盡能受持讀誦如此經典當知是人則與無上希有之法而共相應是土地處大師在中或隨有一可尊重人佛說是已淨命須菩提白佛言世尊如是經典名號云何我等云何奉持佛告須菩提此經名爲金剛般若波羅蜜以是名字汝當奉持何以故須菩提是般若波羅蜜如來說非般若波羅蜜須菩提汝意云何頗有一法一佛說不須菩

提言世尊無有一法一如來說佛告須菩提三千大千世界所有微塵是爲多不須菩提言此世界微塵甚多世尊甚多修伽陀何以故世尊此諸微塵如來說非微塵故名微塵此諸世界如來說非世界故說世界佛告須菩提汝意云何可以三十二大人相見如來不須菩提言不也世尊何以故此三十二大人相如來說非相故說三十二大人相佛告須菩提若有善男子善女人如諸恒河所有沙數如是沙等身命捨以布施若有善男子善女人從此經典乃至四句偈等恭敬受持爲他正說此人以是因緣生福多彼無量無數爾時淨命須菩提由法利疾即便悲泣杖淚而言希有世尊希有修伽陀如此經典如來說我從昔來至得聖慧未曾聞說如是

經典何以故世尊說般若波羅蜜即非般若
波羅蜜故說般若波羅蜜世尊當知是人則
與無上希有之法而共相應聞說經時能生
實想世尊是實想者實非有想是故如來說
名實想說名實想世尊此事於我非爲希有

正說經時我生信解世尊於未來世若有眾
生恭敬受持爲他正說當知是人則與無上
希有之法而共相應世尊此人無復我想眾
生想壽者想受者想何以故我想眾生想壽
者想受者想即是非想何以故諸佛世尊解
脫諸想盡無餘故說是言已佛告須菩提如
是須菩提如是當知是人則與無上希有之
法而共相應是人聞說此經不驚不怖不畏
何以故須菩提此法如來所說是第一波羅
蜜此波羅蜜如來所說無量諸佛亦如是說

是故說名第一波羅蜜復次須菩提如來忍
辱波羅蜜即非波羅蜜何以故須菩提昔時
我爲迦陵伽王斬斫身體骨肉離碎我於爾
時無有我想眾生想壽者想受者想無想非
無想何以故須菩提我於爾時若有我想眾
生想壽者想受者想是時則應生瞋恨想須
菩提我憶過去五百生中作大仙人名曰說
忍於爾生中心無我想眾生想壽者想受者
想是故須菩提菩薩摩訶薩捨離一切想於
無上菩提應發起心不應生住色心不應生
住聲香味觸心不應生住法心不應生住非
法心不應生有所住心何以故若心有住則
爲非住故如來說菩薩無所住心應行布施
復次須菩提菩薩應如是行施爲利益一切
眾生此眾生想即是非想如是一切眾生如

來說即非衆生何以故諸佛世尊遠離一切
想故須菩提如來說實說諦說如說非虛妄
復次須菩提是法如來所覺是法如來所說
是法非實非虛須菩提譬如有人在於盲暗
如是當知菩薩墮相行墮相施須菩提如人
有目夜已曉時晝日光照見種種色如是當
知菩薩不墮於相行無相施復次須菩提於
未來世若有善男子善女人受持讀誦教他
修行爲他正說如是經典如來悉知是人悉
見是人生長無量福德之聚復次須菩提若
有善男子善女人於日前分布施身命如上
所說諸恒沙數於日中分布施身命於日後
分布施身命皆如上說諸恒沙數如是無量
百千萬億劫以身命布施若復有人聞此經
典不起誹謗以是因緣生福多彼無量無數

何況有人書寫受持讀誦教他修行爲人廣
說復次須菩提如是經典不可思量無能與
等如來但爲憐愍利益能行無上乘人及行
無等乘人說若復有人於未來世受持讀誦
教他修行正說是經如來悉知是人悉見是
人與無數無量不可思議無等福聚而共相
應如是等人由我身分則能荷負無上菩提
何以故須菩提如是經典若不願樂人及我
見衆生見壽者見受者見如此等人能聽能
修讀誦教他正說無有是處復次須菩提隨
所在處顯說此經一切世間天人阿修羅等
皆應供養作禮右繞當知此處於世間中即
成支提須菩提若有善男子善女人受持讀
誦教他修行正說如是等經此人現身受輕
賤等若過去世中所造惡業應感生後惡道

果報以於現身受輕苦故先世罪業及苦果報則爲消滅當得阿耨多羅三藐三菩提須菩提我憶往昔從然燈如來阿羅訶三藐三佛陀後無數無量不可算計過去大劫得值八萬四千百千俱胝諸佛如來已成佛竟我皆承事供養恭敬無空過者若復有人於後末世五百歲時受持讀誦教他修行正說此經須菩提此人所生福德之聚以我往昔承事供養諸佛如來所得功德比此功德百分不及一千萬億分不及一窮於算數不及其一乃至威力品類相應譬喻所不能及須菩提若善男子善女人於後末世受持讀誦如此等經所得功德我若具說若有善男子善女人諦聽憶持爾所福聚或心迷亂及以顛狂復次須菩提如是經典不可思議若人修

行及得果報亦不可思議爾時須菩提白佛言世尊善男子善女人發阿耨多羅三藐三菩提心行菩薩乘云何應住云何修行云何發起菩薩心佛告須菩提善男子善女人發阿耨多羅三藐三菩提心者當生如是心我應安置一切衆生令入無餘涅槃如是般涅槃無量衆生已無一衆生被涅槃者何以故須菩提若菩薩有衆生相想則不應說名爲菩薩何以故須菩提實無有法名爲能行菩薩上乘須菩提汝意云何於然燈佛所頗有一法如來所得名阿耨多羅三藐三菩提不須菩提言不也世尊於然燈佛所無有一法如來所得名阿耨多羅三藐三菩提佛言如是須菩提如是於然燈佛所無有一法如來所得名阿耨多羅三藐三菩提須菩提於然

燈佛所若有一法如來所得名阿耨多羅三藐三菩提然燈佛則不授我記婆羅門汝於來世當得作佛號釋迦牟尼多陀阿伽度阿羅訶三藐三佛陀須菩提由實無有法如來所得名阿耨多羅三藐三菩提是故然燈佛與我授記作如是言婆羅門汝於來世當得作佛號釋迦牟尼多陀阿伽度阿羅訶三藐三佛陀何以故須菩提如來者真如別名須菩提若有人說如來得阿耨多羅三藐三菩提是人實語何以故須菩提實無有法如來所得名阿耨多羅三藐三菩提須菩提此法如來所得無實無虛是故如來說一切法皆是佛法須菩提一切法者非一切法故如來說名一切法須菩提譬如有人徧身大身須菩提言世尊如來所說徧身大身即為非

身是故說名徧身大身佛言如是須菩提如是須菩提若有菩薩說如是言我當般涅槃一切衆生則不應說名為菩薩須菩提汝意云何頗有一法名菩薩不須菩提言不也世尊佛言須菩提是故如來說一切法無我無衆生無壽者無受者須菩提若有菩薩說如是言我當莊嚴清淨佛土如此菩薩說虛妄言何以故須菩提莊嚴佛土者如來說則非莊嚴是故莊嚴清淨佛土須菩提若菩薩信見諸法無我諸法無我如來應供正徧覺說是名菩薩是名菩薩佛言須菩提汝意云何如來有肉眼不須菩提言如是世尊如來有肉眼佛言須菩提汝意云何如來有天眼不須菩提言如是世尊如來有天眼佛言須菩提汝意云何如來有慧眼不須菩提言如是

世尊如來有慧眼佛言須菩提汝意云何如
來有法眼不須菩提言如是世尊如來有法
眼佛言須菩提汝意云何如來有佛眼不須
菩提言如是世尊如來有佛眼須菩提汝意
云何於恒伽江所有諸沙如其沙數所有恒

伽如諸恒伽所有沙數世界如是寧爲多不
須菩提言如是世尊此等世界其數甚多佛
言須菩提爾所世界中所有衆生我悉見知
心相續住有種種類何以故須菩提心相續
住如來說非續住故說續住何以故須菩提
過去心不可得未來心不可得現在心不可
得須菩提汝意云何若有人以滿三千大千
世界七寶而用布施是善男子善女人以是
因緣得福多不須菩提言甚多世尊甚多修
伽陀佛言如是須菩提如是彼善男子善女

人以是因緣得福聚多佛言須菩提若福德
聚但名爲聚如來則不應說是福德聚是福
德聚須菩提汝意云何可以具足色身觀如
來不須菩提言不也世尊不可以具足色身
觀於如來何以故此具足色身如來說非具
足色身是故如來說名具足色身佛言須菩
提汝意云何可以具足諸相觀如來不須菩
提言不也世尊不可以具足諸相觀於如來
何以故此具足相如來說非具足相是故如
來說具足相佛言須菩提汝意云何如來有
如是意我今實說法耶須菩提若有人言如
來實能說法汝應當知是人由非實有及以
邪執起誹謗我何以故須菩提說法說法實
無有法名爲說法爾時須菩提白佛言世尊
須有衆生於未來世聽聞正說如是等相此

經章句生實信不佛告須菩提彼非衆生非
非衆生何以故須菩提彼衆生者如來說非
衆生非非衆生故說衆生須菩提汝意云何
頗有一法如來所得名阿耨多羅三藐三菩
提不須菩提言不也世尊無有一法如來所
得名阿耨多羅三藐三菩提佛言如是須菩
提如是乃至無有如微塵法如來所捨如來
所得是故說名阿耨多羅三藐三菩提平等
平等復次須菩提諸佛覺知無有差別是故
說名阿耨多羅三藐三菩提復次須菩提此
法平等無有高下是名阿耨多羅三藐三菩
提復次須菩提由無我無衆生無壽者無受
者等此法平等故名阿耨多羅三藐三菩提
復次須菩提由實善法具足圓滿得阿耨多
羅三藐三菩提須菩提所言善法善法者如

來說非善法故名善法須菩提三千大千世
界中所有諸須彌山王如是等七寶聚滿此
世界有人持用布施若人從此般若波羅蜜
經乃至四句偈等受持讀誦爲他正說所得
功德以前功德比此功德百分不及一千萬
億分不及一窮於算數不及其一乃至威力
品類相應譬喻所不能及須菩提汝意云何
如來作是念我度衆生耶須菩提汝今不應
作如是念何以故實無衆生如來所度須菩
提若有衆生如來所度即是我執衆生執壽
者執受者執須菩提此我等執如來說非執
嬰兒凡夫衆生之所執故須菩提嬰兒凡夫
衆生者如來說非衆生故說嬰兒凡夫衆生
須菩提汝意云何可以具足相觀如來不須
菩提言如我解佛所說義不以具足相應觀

如來佛言如是須菩提如是不以具足相應
觀如來何以故若以具足相觀如來者轉輪
聖王應是如來是故不以具足相應觀如來
是時世尊而說偈言

若以色見我 以音聲求我 是人行邪道

不應得見我 由法應見佛 調御法為身

此法非識境 法如深難見

須菩提汝意云何如來可以具足相得阿耨
多羅三藐三菩提不須菩提汝今不應作如
是見如來以具足相得阿耨多羅三藐三菩

提何以故須菩提如來不以具足相得阿耨
多羅三藐三菩提須菩提若汝作是念如來
有是說行菩薩乘人有法可滅須菩提汝莫
作此見何以故如來不說行菩薩乘人有法
可滅及以永斷須菩提若有善男子善女人

以滿恒伽沙等世界七寶持用布施若有菩
薩於一切法無我無生得無生忍以是因緣
所得福德最多於彼須菩提行大乘人不應
執取福德之聚須菩提言此福德聚可攝持
不佛言須菩提此福德聚可得攝持不可執

取是故說此福德之聚應可攝持須菩提若
有人言如來行住坐卧是人不解我所說義
何以故須菩提如來者無所行去無所從來
是故說名如來應供正徧覺知須菩提若善
男子善女人以三十大千世界地大微塵燒

成灰末合為墨丸如微塵聚須菩提汝意云
何是隣虛聚寧為多不須菩提言彼隣虛聚
甚多世尊何以故世尊若隣虛聚是實有者
世尊則不應說名隣虛聚何以故世尊所說
此隣虛聚如來說非隣虛聚是故說名為隣

虛聚如來所說三千大千世界則非世界故
說三千大千世界何以故世尊若執世界爲
實有者是聚一執此聚一執如來說非執故
說聚一執佛世尊言須菩提此聚一執但世
言說須菩提是法非可言法嬰兒凡夫偏言
所取須菩提若有人言如來說我見衆生見
壽者見受者見須菩提汝意云何是人言說
爲正語不須菩提言不也世尊不也修伽陀
何以故如來所說我見衆生見壽者見受者
見即是非見是故說我見衆生見壽者見受
者見須菩提若人行菩薩乘如是應知應見
應信一切諸法如是應修爲令法想不得生
起何以故須菩提是法想法想者如來說即
非想故說法想須菩提若有菩薩摩訶薩以
滿無數無量世界七寶持用布施若有善男

子善女人從此般若波羅蜜經乃至四句偈
等受持讀誦教他修行爲他廣說是善男子
善女人以是因緣所生福德最多於彼無量
無數云何顯說此經如無所顯說故言顯說
如如不動恒有正說應觀有爲法如暗翳燈
幻露泡夢電雲爾時世尊說是經已大德須
菩提心進歡喜及諸比丘比丘尼優婆塞優
婆夷衆人天阿修羅等一切世間踊躍歡喜
信受奉行

金剛般若波羅蜜經

卅十

十六

西天竺優禪尼國三藏法師號拘羅那他
此云真諦梁武帝遠遣迎接經遊閩越
暫憇梁安太守王方賒乃勤心正法性愛
大乘仍於建造伽藍請弘茲典法師不乖
本願受三請而默然尋此舊經甚有脫悞

即於壬午年五月一日重翻天竺定文依
婆藪論釋法師善解方言無勞度語矚彼
玄文宣此奧說對偕宗法師法虔等並共
筆受至九月二十五日文義都竟經本一
卷文義十卷法虔爾日仍願造一百部流
通供養并講之十徧普願衆生因此正說
速至涅槃常流應化